

Worfeller Kerb

1997



Kerwespruch

Kerwesprouch '97

Onn enn August es is soweit,
in Worfelle is Kerwezeit

Im goanze Ertsche kann mer´s spiehrn,
die Moama dut de Deich ohriehrn

Un mer kann´s vun weidem rische,
denn es kimmt aus alle Kische

Wohltuend is dieser Duft,
vun Kwetschekuche in de Luft

Un a de Baba is oam wetze,
dut sich bei de Erwet hetze

Domit on Kerb wie kennt´s wohl soi,
is wirrer alles schee un foi

Rase mehe, Beete hacke,
dut umgrowwe die Pferdekacke

Hecke schneide, Gasse keehrn,
denn dut er sich die Schuh oischmeern

Bis se soin donn blitzeblokk,
denn rennt er nochmol uff die Bank

Denn uff em Kerwedonz des is halt so,
läßt mer en Haufe Kohle do.

Jetzt geht´s los es is soweit,
die Kerweborsch die stehn bereit,

Die schaffe viel un intensiv,
ja die soin färschterlich aktiv,

Roll uffbaue, Gag probiern,
oans zwaa Liedscher oistudiern,

Donze, lache, treiwes bunt,
do werd so monscher Kehlkopp wund,

Vier Doach long dun die sich verreiße,
fünf Doach denoch noch dinn dun sch....,

Vergesse all ihrn Alltagsfrußt,
unn howwe nur noch Kerwelust,

Denn oans is klar, mer soin all froh
wanns haabt „Die Worfeller Kerb is do“

LIED: „Die Worfeller Kerb is do“

Es erste mol seit Fuffzeh Johr,
ehr lieuwe Leut des is wohl woahr.

Ich hab des garnet glawwe wolle,
bin rum gelaafe wie en Dolle.

Um Mißgeschicke zu belausche,
un Geschichtscher auszutausche.

Doch koan Mensch wollt mer eppes soache,
des wor ver misch kaoum zu ertroache.

Denn ver en rischdisch guude Spruch,
do hob isch oafach nett genuch.

Doch trotzdem kann isch Eisch berichte,
vun zwaa drei dappische Geschichte.

Moin Maache dut sich groad verkrampfe,
un moin Hals dut ach schunn dampfe.

Soll haaße des muß jetzt mol soi,
en Schluck vum kalte Kerwewoi.
Prost !

Erster Streich:
Ver Politik is hier koan Platz,
des wär ach ziemlich ver die Katz.

Doch werd des Thema ohgeschnitte,
awwer net long druff rumgeritte.

Es werd lediglich beweise,
das ah hier in unsre Kreise.

En Umwelt besorchte Terrorsit dut hause,
vor dem ´s die Polizei dut graube.

Wie ehr all wißt fuhr de Castortransport,
ach vorbei an unserm Ort.

Mit Gefahr ver Kloa un Groß,
wo er hie kam war de Deiwel los.

Demonstratione, Sitzblockade,
Transparente, Attentate.

Un die gar so strahlend Fracht,
wurd besser wie Fort Nox bewacht.
Bleibt de Castorzug mol stehe,
sorgt er glei ver groß uffsehe.

Doch ach entlong uff seiner Strecke,
dut er es Intresse wecke.

Ordnungshüter aus em gonze Lond,
kumme donn glei ohgeronnt.

Wonn wie´s hier im Ort geschehe,
en Bauer dut soi Feld oisehe.

Un leit des vielleicht zufellischerweiße,
dirket newer de Castorgleise.

Donn kennt´s em jo ach noch passiern,
das´sen ruckzuck dun oikassiern.

Jetzt folgt erst es imposante,
der große Mut vun de Beamte.

Die schicke eh Amada aus,
un mache sich ach gornix draus.

Das en Hubschrauber, eh Hundestaffel,
eh Hunnertschaft un oanner Geraffel.

Wurd ausgeschickt um zu vermeide,
das en Bauer säht Gedreide.

„Verdäsdlich is wer soveel schafft“,
drumm wurd de Jürgen halt verhaft.

Jürgen du den Acker schnell verpachte,
sonst dun se dich in de Knast verfrachte.

Denn wonn de nächste Castor kimmt,
besucht disch en Scheriff gonz bestimmt.

Jetzt bleibt ver misch nur noch zu soache,
des schlägt mer werklich uff de Maache.

Kaum zu glawwe wos ver Summe,
ver Sondermill so zomme kumme.

Drum singe mer ach ohne Geld,
„Wer soll das bezahle wer hat das bestellt“.

Zweiter Streich:

Ach die Mädsker kumme in de Spruch,
die reiße neemlich Bosse oft genuch

So iss es letztens erst passiert,
das sich oh goanz uhnscheniert

Inn ehre Erwetfreie Woche
feerschterlich sich hat besoffe

Uff oa moa wor se ziemlich merb,
der Erdbeer-Lime der iss schunn herb

Denn mit dene gute Sache,
koann mer ach veel Faxe mache

Als donn vollendet wor ehr groß Werk,
hat se ziemlich fix gemerkt

Das es Zeit wor Hoam zu gehe,
um sich inn ehr Bett zu leje

Der Wesch Hoam lief donn doch spontan,
goanz oanners als vorher geplant

Net veel gelaafe eher gekroche,
unn dehoam erst moa schee gebroche

Boim Blick in de Oammer iss se donn erschrocke
Ehr Gesicht wurd Weiß wie ehr Socke

Wos iss donn los was geht ´n ab hier,
dess sieht jo aus wie e uffgeplatzt Moachegeschwier

Unn vor lauder Schreck hot se donn wie vum Aff gebisse
die Fernbedingung vun de Flimmerkist in de Oamer geschmisse

Ja ja was passiert net alles mi ´m volle Hern,
awwer mer trinkt doch ach moa gern

Melly do derfst de der nix draus mache
monchmoal geschehe halt so Sache

Unn deshalb singe mer jetzt extra fer disch,
„Unn als e moal unn als e moal gepisst“

Dritter Streich:

Mallorca iss spassisch Mallorca iss schee,
mer brauch lediglich eh dick Portmonee

Die Fraue soin willisch es Bier iss kalt,
un do muß mer mit aller Gewalt

de oannern un sich selbst emol zeische,
wos mer doch iss ver eh kloa Seische

Oam Ballermann Sex wo ging des sunst besser,
Oam Strond vun Mallorca on koam oannern Gewässer

do kann mer sich ´s frei vun de Lewwer weg gewwe,
denn nur besoffe läßt sichs dort lewwe

Doch grad des mocht des dort Interessont
drumm soin eh paar Worfeller glei hiegeronnt

Schunn im Fluchzeisch hatte die eh gut Gefiehl,
un sterzte sisch glei in Mensche gewiehl

die erst Nocht so in die net schlofe gonng,
un honn in de Beizze rumgehonge

Moiens donn isch du 's net erfinne,
spiehlst se die Kehrmaschin glatt aus de Rinne

so frisch gewesche fast wie geduscht,
so in se donn oan de Strond gehuscht

Dort oagekumme ging 's donn heiter,
mit de Sauferei glei weiter

Schlapp mache iss hier net droi,
hart muß mer ver Mallorca soi

Middachs um zwaa mer kennt sischs fast denke,
fonge ehr Moache sich oh zu verrenke

Do denkt sisch de Maik es iss halt koan Dumme,
isch eil misch das isch ins Wasser du kumme

weil net nur vun Inne muß mer soi nass,
no ach des Plonsche im Meer macht dort Spass

Drumm ess er aus de Klamotte gesprunge,
un hat sisch pudelarschnackisch ins Meer noigeschwunge

Dort hot er gezappelt voll Iwwermut,
„Kommt noi in die Brieh des dut mol voll gut“

Es hot noch gereischt er konnt 's groad noch soache,
do dut em eh Well voll ins Gnick enoi schloache

Des hot en gerisse die Brill iss geflowwe,
ehr liewe Leit des iss net gelowwe

Es hot en gedunkt er iss fast erstickt,
doch donn wurd die Laache erst rischdisch verzwickt

Die Brill die wor fort er konnt se net finne,
die oannern om Strond honn gedenkt der dut spinne

Denn so wie er war nass nackt un besoffe,
es er schreiend hinner wildfremme Leit her geloffe

Denn er hot´s net bemerkt un er konnt´s wohl net seje,
das die Worfeller Buwwe gonz wo oannerster steje

Die Fremme die soin ruckzuck fortgeronnt,
tja Maik die howwe disch wohl verkonnt

Die Geschischt iss vorbei doch iwwern Maik bleibt zu soache,
er muß sisch oh Woch long ohne Brill dorschschloache

drumm dun mer vers nächste mol uff alle Fälle,
vun Baywatch die Pamela ver disch bestelle

die soll nämlich donn dort verantwortlich sein
ver des wos mer jetzt singe: "Pack die Badehose ein"

Noach so veel gebappel iwver Wasser un Meer,
muß unbedingt wos zum trinke do her

Drumm soach isch moim Mundschenck du disch beeile,
du on misch un die oannern zum Trinke verteile

Donn heb isch moi Glas un des finn isch foi
mit eisch hier zu trinke vum Kerwewoi

Isch binn jetzt om Enn mit moim dolle Geschwätz,
spring jetzt vum Disch hier mt gonz große Setz

Setz uff moi Kutsch druff un donn ziehn mer weiter,
bleibt mer gesund glücklich un heiter

Heit Owend im Soal do getz wirrer los,
do gibt´s wos zu lache ver Kloa un ver Groß

Die Kerweborsch die soin do noch fit,
un lade eisch oi kummt roi un macht mit

Beim Donze beim Lache beim Klatsche un singe,
un dut mit uns uff de Disch erum springe

Glicklich soll se soi unser Kerwezeit,
drumm seit heit Owend ach alle bereit

Zu singe mit uns denn donn wern mer froh
wonn´s haaßt „Die Worfeller Kerb es do“